

Կովկասի փոխարքայութեան սահմաններում Հայ-Լուսաւորչական եկեղեցու գոյից կառավարութեան ժամանակաւոր կանոններ:

Ա. Եկեղեցական գոյքերի վերաբերեալ կանոններ.

1. Հայ-Լուսաւորչական եկեղեցիների գոյից կառավարութիւնը յանձնուում է ծխական հոգաբարձութեանց, որոնք բաղկացած պէտք է լինին եկեղեցու երեցփոխանից և 2—4 անդամից հաւասար իրաւունքներով, որոնց ընտրուում են ծխականներն իրենց միջից եռամեայ ժամանակով:

2. Եկեղեցական հոգաբարձուների ընտրութիւնը կատարուում է ծխականների ընդհանուր ժողովում ներկայ եղողների ձայնից առաւելութեամբ և հաստատուում թեմակալ առաջնորդից:

3. Ծխականների ընդհանուր ժողովում ձայնի իրաւունք ունին այն բոլոր այլ մարդիկ, որոնք առնուազն երկու տարի նոյն եկեղեցու ծուխ են, 25 տարեկան են և օրինական իրաւունք ունին հասարակական պարտականութիւններ կատարելու:

4. Ծխական հոգաբարձուների պարտականութիւնն է օրինաւոր թոյլուութեամբ բանալու ծխի համար դպրոցներ, հիւանդանոցներ, աղքատանոցներ, ագաւտարաններ և այլ բարեգործական հաստատութիւններ:

5. Եթէ եկեղեցական եկամուտները բաւական չլինին ծխի բոլոր կարիքներին բաւարարութիւն տալու, հոգաբարձութիւնը կազմում է ծխականներից միանուագ կամ պարբերաբար դրամով կամ բնական որոշ տուրք ժողովելու նախադիժ: Այդ նախադիժն առաջարկուում է ծխական ընդհանուր ժողովի քննութեան և օրինաւոր կերպով ընդունելուց ու համախօսական կազմելուց յետոյ՝ պարտաւոր է դառնում համաձայնութիւն տուողների համար:

6. Հոգաբարձութիւնը կազմում է իւրաքանչիւր տարուայ ելեւտից նախահաշիւ, որը առաջարկւում է ծխական ժողովի հաւանութեան և հաստատւում է թեմակալ առաջնորդից:

7. Ծխական հոգաբարձուները պարտաւոր են հաշիւներկայացնել թեմակալ առաջնորդին և թէ ծխական ընդհանուր ժողովին, որոնք այդ հաշիւների վերատուգութեան համար ընտրում են վերատուգող յանձնաժողով:

Ա. Հոգեւոր դպրանոցների պատկանող գոյից կառավարութեան մասին:

1. Հոգեւոր դպրանոցների գոյքը (համաձայն 1896 թուին հրատարակուած օրինաց XI հատորի I մասի 1206 յօդուածի) կառավարում են 12 հոգուց բաղկացած հոգաբարձական առանձին խորհուրդներ, որոնց նախագահում է առաջնորդը:

2. Հոգաբարձական խորհրդի անդամների ընտրութեան համար թեմակալ առաջնորդի, կամ նրա կողմից յատկապէս նշանակուած անձի նախագահութեամբ հրաւիրւում է թեմի ընտրողների ժողով՝ դպրանոց գտնուած քաղաքի իւրաքանչիւր եկեղեցուց ծխական ընդհանուր ժողովի ձայնից մեծամասնութեամբ ընտրուած երկու հոգի, թեմի միւս քաղաքների եկեղեցիներից իւրաքանչիւրի կողմից նոյն ձևով ընտրուած մի հոգի, գիւղական շրջաններից իւրաքանչիւր գործակալութիւնից մի մի հոգի, որոնք պէտք է ընտրուեն գիւղական եկեղեցիների ներկայացուցիչների կողմից: Հոգաբարձութեան անդամներն ընտրւում են 4 տարի ժամանակով:

3. Հոգաբարձական խորհրդի անդամներն իրենց պաշտօնում հաստատւում են Ամենայն Հայոց Կաթողիկոսի կողմից:

4. Հոգաբարձական կազմի կէսը երկու տարուց յե-

տոյ թողնում է իւր պաշտօնը՝ առաջին խորհրդի կէսը վիճակով, իսկ այնուհետեւ հերթով:

5. Թեմի ընտրողների ժողովը հոգաբարձական ժողովի իրաւասութեան շրջանի համար ընտրում է է վերաստուգող յանձնաժողով, որի եղբակացութիւնը հաղորդւում է Ս. Էջմիածնի Սինոդին:

6. Կանխապէս կազմած նախահաշիւը, ինչպէս և հոգաբարձական ժողովի հաշիւը հաստատւում է Ս. Էջմիածնի Սինոդի կողմից:

Գ. Վանքապատկան կալուածների մասին:

1. Վանքապատկան գոյից կառավարութիւնը յանձնւում է վանքական իշխանութեան:

2. Վանքապատկան գոյքի կանոնաւոր կառավարութեան վրայ հսկելու համար թեմակալ առաջնորդները կարող են հրաւիրել վանական վարչութեանց օժանդակ և աշխարհական անձինք:

Իսկականը ստորագրած է.

Սեանս Սեկրետար Բարօն Նօրէ.

Ուղիղ է Ն. Կ. Մ. Կովկասի, փոխարքայի դիւանաւան փոխ դիւանապետի փոխարէն Ն. Նիկոլսկի.

Համեմատեց դիւանատան գործաւար Վ. Վալկելի:

